

# كلام قبل الرحيل

شعر

م. وحيد حامد الدهشان

قصيدة

سلسلة إبداعية غير دورية

يشرف علي إصدارها

ناصر صلاح - وحيد الدهشان

العدد ( ١٤ )

يوليو ٢٠٠٧

## كلام قبل الرحيل

أكيد راح ييجي يوم ع الناس  
في ساحة الفكر والإحساس  
ويسأل حد ع الدهشان  
في ندوة أوفي أي مكان  
وحد يرد وبحسرة  
تعيش انت  
يقول والله ما عرفنا  
ومين إمتي  
يجوز تذرف عينيه دمه  
يجوز لأه  
يجوز هيقول دا كان شمعه  
يجوز لأه  
ويوم ما هاموت  
أكيد راح يبغي صعب ومر

وبرضه أكيد أكيد هيمر  
ويوم ماما هامت  
هتحنن ناس وتشت ناس  
وفي الدفننه وفي المعزى  
بيترسم الزعل ع الوش  
وناس صادقة وناس بتغش  
ودا عادي وببيدي  
ولو كان اللي مات نسمة  
وصحبة ورد متندي  
ما فيش في الدنيا دي واحد  
في حب الخلق خد عشرة علي عشرة  
ولو قديس ولو ماجد  
وبرضه مافيش ولا واحد  
في كره الخلق خد عشرة علي عشرة  
ولو مزعوم ولو حشرة

ويوم ما هامت  
حبايبي اللي حواليه  
أكيد هيحسوا بالفرقة  
وناس راح تبكي وبحرقه  
في أول يوم وتاني يوم  
وجايز برضه تالت يوم  
وحبه بحبه يبرد قلب  
أحبابي وأصحابي  
ويهدا الحزن والفوران  
ومهما يكون فحزن الناس  
أخف كثير من البركان  
وتنهزم الهدوم السوداء  
والطرح اللي معقوده  
وبرضه الغم والأحزان  
في تاني عيد في تالت عيد

وتكسب لازم الألبان  
ودايماً فيه مدى للوم  
عشان قطعاً وبالتأكيد  
كما قالوا وكما شفنا  
لا عمر الفرح كان بيدوم  
وبرضه الحزن ما بيدوم  
ويوم ما هاموت  
هيدن كل ديك الفجر  
ويطلع في الميعاد القطر  
ويفضل في البلاد القهر  
سواء كان الزعيم موجود  
أو اتمكن فريق أبنه  
من أنه يسود  
هيفضل يجري في  
نفس اتجاهه النهـر

ويفضل بين جميع الخلق  
حب وكـره ود وهجر  
وشمس الدنيا مش هتغيب  
وبرضه قمرها راح يظهـر  
في أول كل شهر غريب  
وراح يكـبر مع الأيام  
لحد ما يبقي بدر تمام  
ونوره يسحر الأبواب  
ويـرجع تاني يتلاشي  
وحبه بحبه يتوارب عليه الباب  
وكل اما الشهور هتهل  
يـرجع زي عادته يطـل  
مفـيش حاجه هتتغير  
نجومنا في سماريفنا  
هتفضـل زي

لـوز القطن ما ينور  
وتفضل برضه مخبيه  
ما بتبانث في سما البندر  
لغاية إمتي ما اعرفشي  
يجوز لما النفوس تنصف  
تروق الدنيا من تاني  
ويرجع شكلها أطف  
وجايز اموت وانا بادئ  
قصيدة جديدة من  
قبل أما اكملها  
وجايز اموت وانا في جملة  
باحاول إنني أجملها  
وجايز اموت وانا خارج  
يا دوب من قلب دوامة  
وداخل قلب دوامة

وجايز اموت واننا نفسي  
فـ حاجات يامنا  
وخذ مـثلاً  
أنا نفسي أشوف العدل في بلادي  
واشوف المجدي بيـنادي  
عليـنا لمـا يـديـنا  
ورغم أنـوف أعاديـنا  
نغير لهجة الأوطان  
ونقطع بس بالقـوانين  
لسان الكـذب والبهـتان  
واشوف للحق ألف لسان  
ونفسي أشوف لنا قـمة  
تـوحد كلمـة الأمـة  
ولكن مش علي الخيبة  
تكيد أعداءنا لـونـوبة  
تـزيح الهمـم والغمـة  
ونفسي أشوف في أوطاني



نظام للحكم رباني  
شريعة وشورى ومبادئ  
ونفسي أشوف رئيس سابق  
وبقي عـندنا انتخابات  
ومش نصب وتلات ورقات  
ونفسي نحرر الأقصي  
وكل عواصم الأعراب  
من العملاء من الأغراب  
وبقي لنا صحيح هيبه  
وماتجيش مننا العيبة  
نوري الخلق مين احنا  
وع الدنيا تطيب ريحنا  
مروءه ومجدعة ونخوه  
عشان كل البشر إخوه  
وتبقي الشده ع العادي  
وقالوا الأظلم البادي  
لحد ما يعترف بالحق

وأوتـاد الأصـول تـندق  
ونفـسي نحاسـب الأنـجاس  
وكل اللـي عليـنا داس  
وسود لون حـياة النـاس  
ونسقيهم بـنفس الكـاس  
واشوف كل اللـي كان مسـئول  
وكان في الظلم سيف مسلـول  
ما هوش لاقـي يجيب الفـول  
وواقف في طابـور العـيش  
في ذل وبهدلـة وتلطـيش  
ونرفـع عـن ولادـه الجـاه  
يعيشوا زي خلـق الله  
ولما يحس باللـي جـناه  
ويسأل إـيه ساعـتها عمـاه  
أكـيد يـومها هـيـسـتغفر  
يـشغل مـخـه ويفكـر  
ولما يدوق مـرار الـذل

تتغير مفاهيمه  
ونلفي كلامه زي الفل  
وهي صرخ وبالتأكيد  
يقول إسلامنا هو الحل  
ونفسي يصيح الفنان  
مقدر نعمة المنان  
واشوف أغانينا والأفلام  
بدون إسقاف بدون عصيان  
ونفسي أشوف مني الشاذلي  
ولابسه حجاب  
ويفضل فكرها وثواب  
ونفسي يرجع الإبداع  
من التوهان وزيف خداع  
يلون جو أفكارنا بكل جمال  
وترجع حكمة الموال  
وإبداعنا يكون هادف  
عشان فعلا مافيش فايده

ولا قـيـمـة ولا مـعـنـي  
إذا بالحـرف بدءنا  
وركبنا كـلام هايف  
ونفسي النـقد يبقـي نـزيه  
ونحـرس بـاب مجلاتنا  
جـرايدنا ... قنـواتنا  
وما نـدخـلش أي سـفـه  
ونفـسي أجـوز اولادي  
لـناس مـتربـيـين أطـهـار  
واشـوفهم في العـطاء أنـهـار  
ونفـسي افـرح بأحفادي  
واشـوفهم طـيـبين أبـرار  
واورثهم سـنـين عمـري  
وأحـكي لـهم وأقـرا لـهم  
سـطـور النـثر والأشـعار  
واشـوفهم في طـريق الخـير  
طـريق دـعوة رـسـول الله

بحسب يكملوا المشوار  
ونفسي كمان أوصيهم  
يراعوا منتدى الدهشان  
وتعلا رأيته بأيديهم  
ما دام الأمر في الإمكان  
ويفضل للبلد علي طول  
وإشعاعه يدوم موصول  
ينور فكر أولادنا  
ما هم زادننا وزوادنا  
ويفضل للثقافة مكان  
ولورجعت كما كانت  
زمان حرية الأوطان  
فيبقى شعبه للإخوان  
ويومها أموت وأنا مرتاح  
وأستني هداياهم  
من الدعوات مسا وصباح  
ونفسي أشوف مدرستي

اللي سابتناف سنة رابعة  
وكانت زي أعذب ميه  
في أجمل مكان نابعة  
وأبله بسيمة كانت قمة الروعة  
نسيت في الدنيا ناس ياما  
ومانا نسيتهاش  
كانت بلسم كانت ترياق  
كانت إخلاص كانت أخلاق  
وبسمة في الحياة صافية  
ونفسي أشوف مدرستي  
في سنة خامسة  
براعة وجهه مانسيتهاش  
برغم اني كتير بانسي  
وأبله رقية كانت رقه  
وفي دنيا الجمال همسه  
وكانت في الحنان لمسه  
ونفسي أشوف من الإعدادي

أستأذي علي طه  
وكان في لغتنا زى النجم في سماها  
ونفسي أشوف  
صليحة الرائد الحالم  
وفوزي جعفر الحازم  
وكانوا في الحياة منارات  
وكانوا للقيم علامات  
كان التعليم في أيامهم  
رسالة تنعش الآمال  
ومش سكة لجمع المال  
ما كان زى الأيام دي  
وظاهرة الصورة مش خافية  
جشع ودروس ومجموعة  
العيال تدخلها  
إما بذوق يا بالعافية  
ونفسي لو أقابل ناس  
ما شفتش فيهم الإنسان  
ولا في سلكهم الإنسان  
ومش قصدي أعريهم

ولا هاذك رأسهم  
ولكن نفسي أسألهم  
على اللي جنوه وإيه كسبوه  
وليه مات الضمير فيهم  
ونفسي أموت وأنا مسامح  
نفوس حتى اللي ظالميني  
وكل الناس مسامحيني  
ونفسي أحج بيت الله  
ويبلغ قلبي كل مناه  
وارجع صفحتي بيضا  
واحس برفرفات النور  
بسعي القلب كان مشكور  
وإن الذنب بات مغفور  
وإن الحج كان مبرور  
ونفسي أصلح الغضبان  
واطيب خاطر الزعلان  
واصف في كل متكدر  
ونفسي أصلح الدنيا  
ولكن شكلي مش هاقدر

٢٠٠٧/٦/١٩